

SIARAN MEDIA

31 PERUSAHAAN PERKHIDMATAN PENJAGAAN KANAK-KANAK BAKAL BERDEPAN DENGAN PENALTI AKIBAT DAKWAAN KARTEL PENETAPAN HARGA

KUALA LUMPUR, 29 DISEMBER 2025 – Suruhanjaya Persaingan Malaysia (MyCC), sebuah agensi di bawah Kementerian Perdagangan Dalam Negeri dan Kos Sara Hidup (KPDN), telah mengeluarkan Keputusan Cadangan terhadap 31 perusahaan atas penglibatan mereka dalam kartel penetapan harga berkaitan dengan perkhidmatan penjagaan kanak-kanak di negeri Kelantan. Sebanyak 31 perusahaan tersebut didapati, pada peringkat yang dicadangkan, telah melanggar seksyen 4(1) dibaca bersama seksyen 4(2)(a) dan 4(3) Akta Persaingan 2010 [Akta 712].

Melalui penyiasatan MyCC, ia didapati bahawa perusahaan-perusahaan tersebut bukan sahaja telah berbincang, malah akhirnya bersetuju dengan cadangan untuk menetapkan harga lantai bagi perkhidmatan penjagaan kanak-kanak semasa mesyuarat persatuan yang diadakan pada September 2023. Keputusan yang dicapai dalam mesyuarat tersebut kemudiannya disampaikan kepada semua pihak yang hadir melalui satu memorandum. Susulan mesyuarat tersebut, satu pengumuman awam turut dibuat melalui akaun Facebook rasmi persatuan yang menyatakan bahawa para pengusaha pusat penjagaan kanak-kanak telah sebulat suara bersetuju untuk menetapkan harga lantai bagi perkhidmatan penjagaan kanak-kanak yang berkuat kuasa mulai tahun 2024. MyCC mendapati bahawa perjanjian tersebut mempunyai objektif untuk menghalang, menyekat atau mengekang persaingan secara ketara dalam penyediaan perkhidmatan penjagaan kanak-kanak di negeri Kelantan.

Adalah penting untuk ditekankan bahawa pada peringkat ini, Keputusan Cadangan tersebut merupakan dapatan awal dan ia tidak boleh dianggap bahawa perusahaan-perusahaan ini telah melanggar Akta 712 secara konklusif.

Perusahaan-perusahaan ini juga telah dimaklumkan mengenai penalti kewangan yang dicadangkan. Mereka diberi peluang untuk mengemukakan representasi bertulis dalam tempoh 30 hari selepas menerima Keputusan Cadangan serta membentangkan

representasi lisan di hadapan Suruhanjaya pada tarikh yang akan ditentukan kemudian. MyCC hanya akan mengeluarkan Keputusan Akhir selepas mempertimbangkan representasi yang dibuat oleh perusahaan-perusahaan ini bersama-sama dengan bukti yang diperoleh semasa penyiasatan.

Tan Sri Dato' Sri Idrus bin Harun
Pengerusi
Suruhanjaya Persaingan Malaysia

###

Untuk pertanyaan media, sila hubungi:

Bahagian Polisi dan Komunikasi

Telefon Bimbit: +6019 269 6037

Emel: pcd@mycc.gov.my

Mengenai Suruhanjaya Persaingan Malaysia (MyCC)

Ditubuhkan pada April 2011 melalui Akta Suruhanjaya Persaingan 2010, Suruhanjaya Persaingan ialah satu badan bebas bertanggungjawab untuk menguatkuasakan Akta Persaingan 2010, yang dilaksanakan untuk melindungi proses persaingan yang seterusnya akan merangsang produktiviti, keusahawanan yang berterusan dan inovasi dalam kalangan perusahaan, lantas mewujudkan pilihan produk atau servis yang lebih banyak kepada pengguna dan kualiti yang lebih baik pada harga yang berpatutan.

Akta 712 ini terpakai kepada semua aktiviti perdagangan yang dijalankan di dalam dan di luar Malaysia yang memberi kesan kepada persaingan dalam pasaran Malaysia. Ia menyediakan kerangka pengawalseliaan termasuk kuasa untuk menyiasat, menghakimi, dan mengenakan hukuman kepada pelaku-pelaku yang melanggar undang-undang persaingan.

MyCC telah menyambut ulangtahun yang ke-14 pada 1 April 2025 dan sehingga kini, MyCC telah mengambil tindakan tegas terhadap lebih dari 200 syarikat berkaitan dengan kartel dan penyalahgunaan kedudukan dominan yang telah dengan jumlah keseluruhan penalti kewangan yang telah dikenakan melebihi RM667 juta. Keutamaan semasa MyCC adalah termasuk meminda Akta untuk memperkenalkan rejim kawalan penggabungan, menumpukan usaha kepada kartel tipuan bida, kartel dalam sektor makanan dan pertanian, serta menangani cabaran yang dihadapi oleh perundangan dan dasar persaingan berikutan ekonomi digital. Untuk maklumat lanjut mengenai MyCC, sila layari laman sesawang www.mycc.gov.my.